

Headlines

1. सरकारै अज्ज लोकसभा च इक राश्ट्र इक चुनां सरबंधी बिल पेश कीता। विरोधी धड़ें नै इसी संविधान दे मूल ढांचे गी बगाड़ने दी कोश्ट करार दिंदे होई एहदा विरोध कीता।
2. राज्यसभा च भारतीय संविधान दी 75 बरें दी शानदार जात्तरा पर चर्चा अज्ज बी जारी। केंद्री मंत्री जे पी नड्डा होरें जम्मू-कश्मीर थमां दफा 370 गी हटाने लेई प्रधानमंत्री मोदी हुंदी सराहना कीती।
3. प्रधानमंत्री नरेंद्र मोदी होरें अज्ज राजस्थान च 46 ज्हार करोड़ रपे दिएं विकास परियोजनाएं दी शुरूआत कीती।
4. रेलवे सुरक्षा आयोग नै रियासी कटड़ा रेल लिंक दा शुरूआती मुआयना कीता।
5. जम्मू-कश्मीर च ठंडू दा प्रकोप बरोबर जारी, ज्यादातर इलाके च घट्टोघट्ट तापमान होर झिगड़े पुज्जा।

LS-ONOE

इक राश्ट्र इक चुनांऽ सरबंधित द'ऊं बिल अज्ज लोकसभा च पेश कीते गे। कनून मंत्री अर्जुन राम मेघवाल होरें जियां गै 129मां संविधान संशोधन बिल 2024 ते केंद्र शासित प्रदेश विधि संशोधन बिल 2024 सदन च रक्खे।

एहदे पर विरोधी धड़ें मत विभाजन दी मंग कीती। 269 मिम्बरें च बिल पेश कीते जाने दे हकै च ते 198 मिम्बरें एहदे खलाफ वोट कीता। कांग्रेस, तृणमूल कांग्रेस, डीएमके, शिवसेना, मार्क्सवादी कम्युनिस्ट पार्टी सने होरनें विरोधी धड़ें बिल पेश कीते जाने दा विरोध जताया ते इसी संविधान दे बुनियादी ढांचे पर हमले दी कोश्ट करार दित्ता। उनें मंग कीती जे बिल गी जांच लेई संयुक्त संसदी कमेटी कश भेजेआ जा। कनून मंत्री मेघवाल होरें विरोधी धड़ें दे आरोपें गी खारज करदे होई आखेआ जे एह बिल संविधान दी मूल ढांचे दे खलाफ नेई न ते मुख दे पैहले कनून मंत्री डॉ. भीमराव अम्बेडकर हुंदे आसेआ दित्ते गेदे बयान गी दोहरांदे होई आखेआ जे संविधान दे मूल ढांचे च कदें बी कोई बी ताकत बदलाव नेई करी सकदी। लोकसभा दी कार्रवाई इसै बैहसबाजी दे चलदे कन्नै तोड़ी स्थगित करी दिती गई।

RS Nadda

राज्यसभा नै अज्ज भारतीय संविधान दी 75 बरें दी शानदार जात्तरा पर अपनी विशेष चर्चा अगगे शुरू कीती। सदन दे नेता ते केंद्री मंत्री जगत प्रकाश नड्डा होरें चर्चा च हिस्सा लेंदे होई आखेआ जे भारत ना शड़ा इक बड्डा लोकतांत्रिक मुल्ख ऐ, सगुआं एह लोकतंत्र दी जननी बी ऐ। उनें दफा 370 ते 35-ए दे जम्मू-कश्मीर पर माडे असर गी उजागर करदे होई आखेआ जे इंदे चलदे जम्मू-कश्मीर च केंद्र दे कनूनें ते स्कीमें दा फैयदा नेई पुज्जी सका'रदा हा। उनें आखेआ जे 370 दी वजह कन्नै जम्मू-कश्मीर च लोकतंत्रद गी सेही मायने च जमीनी सतह तगर पुजाने च केई रूकावटां आवा करदियां हियां। उनें आखेआ ज इनें धाराएं दे हटने कन्नै गुज्जरे-बकरवाले ते होरनें समुदायें गी बी उंदे लेई बनाई गेदिएं स्कीमें दा लाह पुज्जना यकीनी बनी सकेया ऐ। उनें दफा 370 हटाने च प्रधानमंत्री नरेंद्र मोदी हुंदी कोश्टें दी सराहना कीती।

<><><><><><>

PM-Inauguration

प्रधानमंत्री नरेंद्र मोदी होरें अज्ज जयपुर च 46 ज्हार 300 करोड़ रपे कोला मती लागत आहिलयें 24 परियोजनाएं दा किश दा उद्घाटन ते किश दा नीह पत्थर रक्खेआ जिंदे च उर्जा, सड़क, रेलवे ते पानियै सबरंधी परियोजनां शामिल ना। मोदी होर राजस्थान च राज्य सरकार दे कार्जकाल दा इक्क बरा पूरा होने पर लोआए गेदे इस समारोह च शामिल होने गेदे हे। इस मौके जनसभा गी संबोधित करदे होई मोदी होरें आखेआ जे सरकार राजस्थान दे पूरे-पराते विकास लेई बचने बज्झी दी ऐ। उनें पानियै सरबंधी मुद्दे दे नबेडे दे महत्वे गी उजागर करदे होई मध्य प्रदेश ते राजस्थान बश्कार होए दे समझौते दी सिफत कीती। उनें पानी दे संरक्षण ते एहदे सलीके ते सरफे सिर इस्तेमाल करने पर बी जोर दित्ता। मोदी होरें आखेआ जे इलाकाई मसले-मुद्दे दे नबेडे लेई असें'गी किट्टे रलियै कम्म करना लोडचदा तां जे टिकाऊ विकास गी यकीनी बनाया जाई सकै।

<><><><><><>

LG-Meetings

उप-मुख्यमंत्री सुरेंद्र चौधरी, जल शक्ति मैहकमे दे मंत्री जावेद अहमद राणा ते भारतीय जनता पार्टी दे वरिष्ठ नेता विबोध गुप्ता होरें अज्ज उपराज्यपाल मनोज सिन्हा हुदे कन्नै बक्ख-बक्ख मलाटी कीती। बक्ख-बक्ख होई दी इनें मलाटियें च तिन्ने नेताएं लोक महत्व ते विकास सरबंधी मुद्दे उपराज्यपाल हुंदे अगगे रक्खे।

GoC White Knight

व्हाईट नाईट कोर दे जीओसी ते **Ace of Spades** डिविजन दे GoC नै त्रिसतर ते अनीता दा दौरा करिए कारवाइयें सरबंधी तैयारियें दा जायजा लैता। इस मौके पर सेना दे दवें वरिष्ठ अफसरें सैनिकें दी निश्ठा ते समर्पण भाव दी सराहना कीती। दवें अफसरें कारवाइयें दौरान उच्च कोटि दे पेशेवराना मानकें दी महत्ता बनाई रखने पर जोर पाया। इस दौरे दा मकसद हा जे एह सुनिश्चित कता जा जे सैनिक कारवाइयें सरबंधी चुनौतियें लेई पूरी चाल्ली तैयार ना।

<><><><><><>

JMC-Commission

जम्मू नगर निगम दे आयुक्त डॉ. देवांश यादव होरें अज्ज जम्मू दक्खन दे गांधी नगर दा दौरा लाया ते जारी विकास कम्में दी समीक्षा कीती। इस दौरान तकरीबन 1 करोड़ 50 लक्ख रुपे दी लागत आले गंदे पानी दे निकास सरबंधी परियोजनां पर चेचा ध्यान दित्ता गेआ तां जे लम्में चिर थमां दरपेश गंदे पानी दे निकास सरबंधी मुश्कलें दा हल कडुआ जाई सकै। यादव होरें परियोजनाएं गी समेंसिर सबूरा करने पर जोर पाया। एहदे अलावा उनें गोल मार्किट च खाने-पीने आहली रेह्णियें गी दुइयें थाहरें पर भेजने दा निर्देश दित्ता ते भीड़ गी घट्ट करने लेई अप्सरा रोड पर 2 टैरी गड्डियें दी पार्किंग गी रोकने दी योजनाएं बारै गलाया।

<><><><><><>

CRS-Reasi

रेल मंत्रालय मतैहत रेलवे सुरक्षा आयोग दी इक टीम नै अज्ज रियासी कटड़ा रेल लिंक दा शुरूआती मुआयना कीता। रेलवे सुरक्षा आयुक्त दिनेश चंद्र देशवाल हुंदी अगुवाई च कीते गेदे इस निरीक्षण च सुरक्षा मानकें, पुलें, पटरियें, सिग्नल सिस्टम, यात्रिएं लेई सुविधाएं ते होरनें बवस्थाएं दा मुख तौरा पर जायजा लैता गेआ। रियासी.कटड़ा रेल संपर्क परियोजना दा इक हिस्सा ऐ जेदा उद्देश्य क्षेत्रीय संपर्क गी बधाना ऐ। अज्ज दे निरीक्षण गी इस परियोजना दे शुरू होने बक्खी इक होर अगड़ी गैं दे रूपै च दिक्खेआ जा करदा ऐ ते मेद कीती जा'रदी ऐ जे एहदे तौलें शुरू होई जाने कन्नै जम्मू-कश्मीर च सैलसफा, संपर्क, आर्थिक विकास दे इक नमें ध्याह दी शुरूआत होई जाग।

<><><><><><>

SHG-Javid Dar

राई-बाई मंत्री जावेद अहमद डार होरें आखेआ जे सरकार आप सहायता समूहें गी सशक्त बनाने आस्तै प्रतिबद्ध ऐ। मंत्री होरें एहू गल्ल आशाकारी प्रदर्शनी ते कल होए दे समापन समारोह दे दौरान आक्खी। आशाकारी प्रदर्शनी दा सरिस्ता जम्मू-कश्मीर आजीविका मिशन नै कीते दा हा। इस प्रदर्शनी च बक्ख-बक्ख आप सहायता समूह दे सदस्यें अपने-अपने कौशल गी दस्सेआ। आप सहायता समूह दे सदस्यें पासेआ कला, शिल्प ते पकवानें दे स्टाल लाए गो। समापन समारोह दे मौके पर मंत्री होरें आप सहायता समूहें दे उत्पादें गी बजारें तगर पजाने आस्तै जोर पाया। उनें अगे आखेआ जे सरस मेले ज्नेई पैहल कन्नै बी आप सहायता समूह दे बपार गी बदाया जाई सकदा ऐ।



Chanderbhaga Festival Bharderwah

प्रधानमंत्री नरेंद्र मोदी हुंदी वोकल ऑफ लोकल मुहिम ते स्थानीय कारीगरें गी प्रोत्साहित करने लेई हस्तशिल्प ते हथकरघा निदेशालय नै डोडा जिले दे भद्रवाह च चंद्रभागा उत्सव दा सरिसता कीता। इस उत्सव दा उद्देश्य हा जे समृद्ध सांस्कृतिक विरासत ते पारंपरिक हस्तशिल्प गी बढ़ावा दित्ता जाई सकै। इस मौके पर स्थानीय कलाकारें अपने-अपने शिल्प कौशल दा प्रदर्शन कीता। इस कार्यक्रम दे राहें कारीगरें दरम्यान जागरूकता पैदा कीती गई ते उंदे बनाए दे मकामी उत्पादें गी प्रोत्साहित कीता गेआ।



Mission-Shakti

समाज कल्याण विभाग जम्मू तैहत मिशन शक्ति नै एनसीसी ट्रेनिंग अकेडमी नगरोटा कन्नै सांझे तौरा पर डिजिटल साक्षरता ते सरकारी स्कीमें लेइ, महिला एनसीसी कैडेट्स आस्तै जागरूकता सत्रें दा सरिस्ता कीता। इस पैहल दे तैहत महिला एनसीसी कैडेट्स गी जरूरी डिजिटल कौशल कन्नै लैस करना ते उनेंगी 21मीं सदी दे कार्जबल ते सशक्तिकरण लेई तैयार करना ऐ।



Weather

जम्मू-कश्मीर दे उप्परले इलाकें च पिछले 24 घंटें च घट्टोघट्ट तापमान 0 थमां थल्ले आई जाने मगरा सीत लैहर दा प्रकोप होर बदी गोआ ऐ। मौसम विभाग मूजब जम्मू सुबे दे बनिहाल च घट्टोघट्ट तापमान 3.4 डिग्री सैल्यिस दर्ज कीता गोआ। तोआई भद्रवाह च घट्टोघट्ट तापमान 0.8 डिग्री सैल्यिस रेया। कटड़ा च घट्टोघट्ट तापमान 6.7 डिग्री सैल्यिस, कठुआ च 5 डिग्री सैल्यिस ते जम्मू च एहू तापमान 4.9 डिग्री सैल्यिस रिकार्ड कीता गोआ। आने आले दिनें च बी सीत लहर जारी रौहने ते औहदे जोर फगड़ने दी पेशनगोई कीती जा करदी ऐ।

<><><><><><>

Cricket

भारत ते आस्ट्रेलिया बशकार बॉर्डर गवास्कर ट्रॉफी दा त्रीया क्रिकेट टैस्ट मैच जेड़ा ब्रिबेन च खेड्ढेआ जा'रदा ऐ, दे अज्ज चौथे ध्याड़े दी खेड्ढे मुक्कने तगर भारत नै पैहली पारी च 9 विकटें दे नुकसान पर 252 रन्ज बनाई लैते दे हे ते ओहू मसां फॉलोऑन कोला बचेआ ऐ। मेजबान टीम कोला भारत अजे बी 193 रन्ज पिच्छे ऐ। एहदे शा पैहले भारत नै अज्ज बड्डुलै अपनी पैहली पारी च 4 विकटें दे नुकसान पर 51 रन्ज कोला अगे खेडना शुरू कीता हा। भारत दी तरफा के.एल राहुल नै सब्भनें शा मते 84 ते रविंद्र जडेजा नै 77 रन्ज बनाए। पैट कमिन्स नै भारत दे 4 ते मिच्चेल स्टार्क नै 3 खडारी आउट कीते। एहदे शा पैहले आस्ट्रेलिया नै अपनी पैहली पारी च 445 रन्ज बनाए हे।

<><><><><><>